

Zeitschrift: Nebelspalter : das Humor- und Satire-Magazin

Band: 88 (1962)

Heft: 10

Artikel: Mählsuppe-n-uff de Hoose

Autor: Fridolin / Barth, Wolf

DOI: <https://doi.org/10.5169/seals-501234>

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. [Mehr erfahren](#)

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. [En savoir plus](#)

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. [Find out more](#)

Download PDF: 07.08.2025

ETH-Bibliothek Zürich, E-Periodica, <https://www.e-periodica.ch>

Der Sunntig vor der Fasnacht

Stygsch am Morge frieh in d Hose,
Spyrsch, hit isch e bsundre Dag.
Haikel bisch wien e Mimose,
s Härz duet wien e Duubeschlag.
Gohsch voruuse? Blybsch hit dinne?
Nyt meh waisch, es isch kurios.
Bebbi, bruuchsch di nit lang z bsinne:
Morn isch Fasnacht, morn gohts los!

Zähmool klopfsch am Barometer,
Zähmool heersch der Wätterbricht.
Schließlig frogsch der Unkle Peter:
«Gits hit Fehn? Was macht dy Gicht?»
Hets der Himmel ächtsch bigriffe?
D Zytig schrybt, s syg scheen z Davos;
Sofort dänksch: dert solls doch schiffe!
Do bruuchts Sunne, do gohts los!

Zwischenre gohsch in Käller,
Iebsch e Sammlig Drummelmärsch.
D Dagwach rollt, es giengt nit schnäller.
Härz, was wottsch meh, was bigährsch!
D Kinder sitze lengscht am Ässe,
D Mamme duet scho rigoros;
Du hesch alles glatt vergässe ...
Morn isch Fasnacht, morn gohts los!

Furt mit alle Pessimische!
Pletzlig wirsch vor Schrägge blaich.
Haidebritsch! An d Fasnachtskischte!
s Goschtym fir der Morgestraich!!
Sueche, niele und probiere ...
Do dä Waggis sitzt famos.
Jetz no d Larve gschwind laggiere.
Wart nit lenger, morn gohts los!

Frieh ins Näscht und ohni Brumme;
Zyt, daß du der Kopf zue machsch.
Stell drei Wegger um di umme,
Daß de jo nit z spoot verwachscht.
Isch der Schloof au kurz und luusig,
Ligsch halt doch em Gligg im Schoß;
Denn dur d Draim do klingts wie Muusig:
Morn isch Fasnacht, morn gohts los!

Blasius



Mählsuppe-n-uff de Hoose

«Gopfrid Stutz noonemoole (und no-n-e bitzeli wieschter)!» het der Noldi gfluecht. Mer sinn näbenenander in däre glaine, haimelige Baiz gsässse-n- und händ is uff d'Zibelewahje gfrait. By däre nooble Bischäftigung, wo me bikantlig numme-n-aimool im Johr haidermäßig frieh am Dag drybt, leffle die maischte Basler gärn zerscht e blutschedig volle Däller brennti Mählsuppe. Das hämmer au welle.



Aber dä Dubel am Disch näbezue het der Servierjumpfere-n-e Schupf gäh. D'Mählsuppe-n-isch em Noldi - no rächt guet warm! - iber d' Hoose gaitscht.

Er het der Waggis agha. Zem Glick mit schwarze-n-und nit mit wyße Hoose! Uff de schwarze Hoose, ha-n-y dänkt, gseht me-n-am Morgestraich die Mählsuppe-Meese nit eso guet. 's Unglick isch also numme halber eso groß gsi. (Numme hämmer jetz lenger miese-n-uff unser Mählsuppe warte!)

Nadyrlig ha-n-y der Noldi gfroggt, worum er denn eso arg fluech?

«He, das sinn doch myni scheeschte, beschte-n-und vor allem myni ainzige Smokinghoose, Du Sirmel! Smokinghoose! Du hesch allwág no nie nyt vom ene Maskebal gheert, wa?!» (Der Sirmel ha-n-y nadyrlig nit verdient.)

Y ha-n-e Rumpf gmacht uff der Stirne wie-n-e Frogzaiche.

«He, jo - erschtens sinn das die ainzige schwarze Hoose, wo-n-y ha. Und zwaitens sinn si us eme guete, wullige Stoff gschnyderet. Die kasch nit aifach wäsche-n-und glette! In de wyße Hoose ka me sich derfir allerdings wiescht verkelte-n-am Morgestraich!»

Y ha grinst, und d'Mählsuppe - zwaiti Ufflag - isch au grad ko. Mer händ afoh sirpfle. Am Morgestraich darf me. Aber der Noldi het als no-n-e fischter Gsicht gmacht. «Hoose», het er brummlet, «sinn aifach my schwachi Syte-n-am Morgestraich.» Und derno het er doch no afoh lache.

«Kennisch die Gschicht nit, wie-n-y vor dryzäh Johr um der ganz Morgestraich umme ko bi? Also, loos jetz zue!

Y lauf scheen frieh, mit der Drumme-n-am Buckel, in d'Stadt yne-n- und gege 's Clique-Lokal. 's isch kaibemäßig frisch gsi, het's mi dunkt, an däm Morge. Y sitz an Disch ane, schlief uus mym Räägemantel und leffle der erscht haiß

Däller Mählsuppe. Hailoos spoot erscht kemme die Letschte ko go schnuuffe. 's haig ene schier nimme glängt!

Y bi fertig gsi mit der Suppe-n-und fang grad a:

«Y ka das nit verstoh, daß ihr allewyl erscht im letschte-n-Augeblick kemme. Am Oobe vorhär mach y alles zwág dahaim. Y stand byzytte-n-uff, wäsch mi e bitzeli, rasier mi sogar und leeg mi sorgfältig und ruehjig und überlegt a, nimm d'Drumme-n-und lauf gmietlig dury. Mir längt's allewyl brächtig. Organisation und Iberleegig isch alles!»

«Uuuse! Ystohl!» brielt unser Tambourmajor do grad. Mir alli uff und uuse!

Der Tambourmajor gitt mer en einzige Blick; y ka Der sage: Zwai eso Blick deede glatt e Roß! Und derno donneret er mi a:

«Organisation und Iberleegig, jo verdeckel! Derno kunnsh du also äxbräß halber blutt an Morgestraich?! Allez, hopp! Marsch, haim! Und en andermool leggsch Hoose-n-a zem Waggis! Kurzi Underheesli und blutti Bai sinn wäder e Charivari no-n-e Waggis. Was bildsch denn du der aigedlig y? Organisation und Iberleegig! Däwäg ka-n-y au zytig do sy, wenn y halber blutt kumm. So, und jetz hau's haim! Mir andere mien jetz ab. Achtung! Morgestraich ...»

Sy «Vorwärts, marsch!» ha-n-y nimme gheert. Mit aim Satz bi-n-y in d'Baiz, in Rägemantel gschloffen-und haim. Was y derno am Nohmidaag alles z'heere biko ha, kasch der jo dänke!»

Mit däm isch's Vieri worde. Und der Noldi het mer e Blick gäh und grinst:

«Allewyl no lieber Mählsuppe-n-uff de Smokinghoose-n-as gar e kaini Hoose!» Fridolin

